

Nannunik illersuineq piniarnerlu pillugit Namminersornerullutik Oqartussat nalunaarutaat

Piniarnek aallaaniarnerlu pillugit inatsisartut inatsisaanni nr. 12-imi, 29. oktober 1999-meersumi § 2, imm. 4, § 8, §§ 11-13, § 15, imm. 4 aamma § 17 kiisalu Pinngortitamik illersuineq pillugu Inatsisartut inatsisaanni nr. 29-mi, 18. december 2003-meersumi § 5, § 35, § 36, imm. 2, § 60, imm. 2 aamma § 61 malillugit aalajangersarneqarpoq:

Atuuffi

§ 1. Nalunaarummi matumani nunami aalisarnikkullu imartami Kalaallit Nunaata oqartussaaffigisaanni nannup (*Ursus maritimus*) illersugaanera piniagaaneralu pineqarpoq.

Imm. 2. Avannaarsuani Tunumilu Nunamut Allannngutsaaliukkamut kiisalu Qimusseriarsuarmi Uumasunik eqqissisimatitsivimmu appakaassinnaanermut, tassunga ilanngullugu sumiiffinni pineqartuni piniarsinnaatitaasut piniarnerannut, immikkut aalajangersakkat atuupput. Aalajangersakkat sumiiffiit taakku marluk pillugit immikkut nalunaarutini aalajangersarneqarput.

Eqqissisimatitsineq

§ 2. Nannut nunami aalisarnikkullu imartami Kalaallit Nunaata oqartussaaffigisaani eqqissisimatitaapput, taamaattoorli § 3 takuuk.

Imm. 2. Nanuaqqat arnavissallu ataatsimik amerlanerusunilluunniit piaqqisartut nunami aalisarnikkullu imartami Kalaallit Nunaata oqartussaaffigisaani eqqissisimatitaalluinnarput.

Imm. 3. Imm. 2 naapertorlugu "nanuaqqat" tassaapput nanuaqqat utoqqaassusiat apeqquataatinnagu arnaminnik pinngitsuuisinnaanngitsut.

Imm. 4. Nannut apissiminniittut akornusersornissaat, tassunga ilanngullugu apissiinik assaanissaq, inerteqqutaavoq.

Pisassiissutininik piffissanillu piniarfiusinnaasunik aalajangersaaneq

§ 3. Naalakkersuisut nannunik ukiumut pisassiissutininik aalajangersaasassapput. Pisassiissutit aalajangersarneqassapput nunat tamalaat isumaqatigiissutaat, uumassusilinnik misissuisut siunnersuinerat, atuisut ilisimasaat kiisalu Piniarnek Pillugu Siunnersuisoqatigiinnik tusarniaasimaneq eqqaamaniarlugit.

Imm. 2. Imm. 1 naapertorlugu pisassiissutit ilaat akiliisitsilluni piniartitsinermut atorineqassasut Naalakkersuisut aalajangersarsinnaavaat. Akiliisitsilluni nannunniartitsinermut immikkut aalajangersakkat akiliisitsilluni piniartitsineq pillugu nalunaarummi aalajangersarneqassapput.

Imm. 3. Pinngortitaassutsimut tunngasut pissutigalugit angutiviaannarnut arnaviaannarnulluunniit

utoqqaassutsinullu aalajangersimasunut pisassiissutit killilerneqarsinnaapput, pisassiissutillu pisassiissutitut ikinnerusunut sumiiffinni killilinni pisarineqarsinnaasunut agguataarneqarsinnaallutik.

Imm. 4. Nannut pisassiissutigineqartut taamaallaat piffissami septembarip ulluisa aallaqqaataannit juunip ulluisa 30-annut, ullut taaneqartut ilanngullugit, piniarneqarsinnaapput. Tamatumani pineqanngillat Ittoqqortoormiit Ammassaliullu Kommunii, taakkunani nannut pisassiissutigineqartut taamaallaat piffissami oktoberip ulluisa aallaqqaataannit juulip ulluisa 31-annut, ullut pineqartut ilanngullugit, piniarneqarsinnaapput.

Imm. 5. Ukiumut pisassiissutit tamatumunngalu atatillugu atugassarititaasut tusagassiorfinnut nalunaarutikkut Namminersornerullutik Oqartussallu internettimi nittartagaatigut tamanut nalunaarutigineqassapput.

Imm. 6. Ukioq pisassiivisoq tassaavoq januaarip ulluisa aallaqqaataanit decembarip ulluisa 31-annut, ullut pineqartut ilanngullugit.

Pisassiissutininik agguassineq

§ 4. Piniarneq pillugu Siunnersuisoqatigiit pisassiissuteqarluni nannunniarnermut killiliussat pillugit tusarniaavigineqassapput. Pisassiissutit kommuninut pisassiissutitut agguataarneqarnerat Kalaallit Nunaanni Aalisartut Piniartullu Kattuffiata (KNAPK) aamma Kalaallit Nunaanni Kommuneqarfiit Kattuffiata (KANUKOKA) tusarniaavigineqareernerisigut Aalisarnermut Piniarnermullu Naalakkersuisumit aalajangerneqassaaq.

Imm. 2. Aalisarnermut Piniarnermullu Naalakkersuisup kommuninut pisassiissutitut atatillugu pisariaqartumik allaffissornikkut aqutsineq kommuninut isumagissassanngortissinnaavaa.

Imm. 3. Paasineqarpat kommunimi pineqartumi unioqqutitsilluni nannuttoqarsimasooq ukiumi pineqartumi ukiumiluunniit pisassiivimmi tullermi kommunimut pisassiissutit Aalisarnermut Piniarnermullu Naalakkersuisup ikilisinnaavai.

Akuersissutininik tunniussineq agguassinerlu

§ 5. Inuit § 6 naapertorlugu akuersissummik tunineqarsimasut kisimik nannussinnaatitaapput.

Imm. 2. Taamaattoq inuit imm. 1 naapertorlugu akuersissummik pillit nannussinnaatitaanngillat inunnit atuuttumik inuussutissarsiutigalugu piniarsinnaanermut allagartaqanngitsunit assartorneqarunik akissarsiaqarlutilluunniit ingiallortaagunik.

§ 6. § 4 naapertorlugu kommunimut pisassiissutit eqqarsaatigalugit akuersissutininik normulersukkanik qinnuteqaateqartunut atuuttumik inuussutissarsiutigalugu piniarnermut allagartalinnut kommunimilu tassani najugaqartutut inuit nalunaarsorsimaffianni nalunaarsorsimasunut kommunalbestyrelse agguassissaaq. Qinnuteqaateqartut akuersissutininik agguassinermit peqataasinnaassagunik qinnuteqaateqarnerminni atuuttumik inuussutissarsiutigalugu piniarsinnaanermut allagartaqassapput.

Imm. 2. Kommunimut nannunniarsinnaanermut akuersissutit tunniunneqartut nannunniarsinnaanermut qinnuteqaatinit ikinneruppata, imm. 1 takuuk, kommunalbestyrelsip aalajangissavaa akuersissutit qanoq agguataarneqassanersut.

Imm. 3. Kommunalbestyrelsip akuersissummik tunniussinermit atatillugu immersuivissaq nalunaarummut ilanngunneqartoq tunniuttassavaa.

Imm. 4. Kommunalbestyrelse pisassiissutigineqartunik isumannaatsumik nakkutilliisitsissaaq. Pisassiissutigineqartunik atuineq malittareqqissaarneqassaaq piniarnerlu ingerlaannartumik

unitsinneqassalluni kommunimut pisassiissutigineqartut tamakkerneqarniariarpata.

Imm. 5. Kommunalbestyrelsip kommunimut pisassiissutigineqartut tamakkerneqarpata Aalisarnermut Piniarnermullu Pisortaqarfik allakkatigut saaffigissavaa.

§ 7. Akuersissutininik agguaassinermit oqartussaasup aalajangissavaa akuersissutit tunniunneqartut qaqugu aaneqareersimassasut. Akuersissummik pisimagaluartut atorsinnaanaguli imaluunniit atuiumangitsut, piaarnerpaamik akuersissut atorineqanngitsoq akuersissutininik agguaassinermit oqartussaasumut utertissavaat.

Imm. 2. Akuersissutit aaneqanngitsoortut agguaateqqinneqarsinnaapput. § 6, imm. 2 naapertorlugu agguaasseqqittoqassaaq. Qaqugu agguaasseqqittoqassanersoq piniarfissaq aallartitsinnagu kommunalbestyrelsip nalunaarutigissava.

§ 8. Akuersissut inummut namminer muinnaq atuuppoq allanullu tunniunneqassanani tunineqassanani.

Imm. 2. Akuersissut ataaseq ukiumi pisassiivimmi akuersissummik tunniussiviusumi nannumik ataaseraarsinnaatitsivoq. Piffissaq piniarfusinnaasoq akuersissummi takuneqarsinnaavoq.

Piniariaatsit

§ 9. Timmisartut, helikopterit qamutillu motoorillit, snescooterit ilanngullugit, kiisalu angallatit 20 BRT/15 BT sinnerlugu angitigisut nannunniarnermi imaluunniit piniarfissamut piniarfissamiillu angallatigineqassanngillat.

Imm. 2. Toqunartut, nammineq seqqortussiat, kiisartut, nigarsiniutit nannumilluunniit unin-ngatitsiniutit teknikikkut atortut allat atoqqusaanngillat.

Imm. 3. Nannunniarnermi taamaallaat qoorortuut minnerpaamik 30.06-imik (7,62 mm) sulloqqortussusillit atorineqatqusaapput. Qoorortuut eqqarasuartartut nutsuinnartakkalluunniit nannunniarnermi atoqqusaanngillat.

Imm. 4. Nannup pisarineqartup neqaa, amia atorineqarsinnaasortaalu allat tamarmik piniarfimmiit angerlaanneqassapput qimatulineqarlutilluunniit. Piniarfik qimatsinnagu sinnikut peerneqarnissaat sapinngisamik isumaginiarneqassaaq.

Pisanik atuineq, tunisineq tuniniaanerlu

§ 10. Nannuttat tuniniaqqusaanngillat akuersissut naqissuserlugu kommunip allaffia nunaqarfimmiluunniit immikkoortortaq pisamik nalunaarsuereertinnagu, taamaattoqli imm. 3 takuuk.

Imm. 2. Pisanik taakkualuunniit ilaannik tunisisoqassanngilaq pisisoqaraniluunniit akuersissummik piginnittoq akuersissutip assilineranut atsiorsimatinnagu. Akuersissutip assilinerani pisaq kommunimi oqartussanit nalunaarsorneqarsimasoq takuneqarsinnaassaaq.

Imm. 3. Taamaattoq kommunip allaffiata nunaqarfimmiluunniit immikkoortortap ammanerisa avataatigut tuniniaaneq aallartinneqarsinnaavoq allaffik ammarniariartoq nalunaarsuisoqarsinnaappat.

Imm. 4. Nannup ilaanik tuniseqqiinermit tunisinermiluunniit tunisinermut atatillugu akuersissutip assilinerata atsiorneqarsimasoq naqissuserneqarsimasorlu ilaatinneqartassaaq.

Imm. 5. Unioqqutitsilluni nannutaasimasup neqaa, amia pisataalu allat tunissutitut tigoqqusaanatillu pisiarequsaanngillat.

Pisanik nalunaaruteqarneq nakkutilliinerlu

§ 11. Nannuttat tamarmik immersuivissaq nalunaarummut ilanngussaq atorlugu tikinnermi najukkami kommunimut nalunaarutigineqartassapput. Taamatuttaaq pissatat tamarmik nalunaarutigineqassapput. Pisaaq nalunaaqataqarsimappat radiukkulluunniit aallakaatitsissuteqarluni, taakku immersukkamut ilanngullugit tunniunneqassapput. Immersuivissaq immersugaaq § 10 naapertorlugu akuersissutip naqissuserneqarneranut peqatigitillugu tunniunneqassaaq.

Imm. 2. § 10 naapertorlugu nannup ilaanik tunisisoqassanngippat pisaaq immersuivissaq atorlugu piaartumik najukkami kommunimut nalunaarutigineqassaaq.

Imm. 3. Nannuttat tamarmik taamatuttaaq PINIARNEQ-mut nalunaarutigineqassapput ukiumoortumik immersuiffissaaq atorlugu.

Imm. 4. Pinaaqatigiittoqarsimatillugu pisaaq nalunaaruteqartussaaitamit toqqakkamit ataasiinnarmut, assersuutigalugu akuersissummik piginnittumit, nalunaarutigineqassaaq, piniaqataasimasut tamarmik aqqi inuttullu normui nalunaarlugit. Immersuivissakkut nalunaaruteqartussaaitap kisimi pisaaq PINIARNEQ-mut nalunaarutigissavaa.

Imm. 5. Kommunalbestyrelsip qaammatit naaneri tamaasa immersukkat tigusimasani Aalisarnermut Piniarnermullu Pisortaqaarfimmut nassiuttassavaa.

§ 12. Pinerluttulerinnermi inatsimmi tamanna pillugu malittarisassat naapertorlugit imminut illersortariaqarluni iliortoqartariaqarluniluunniit nannuttoqarpat nannutaq tamarmi Namminersornerullutik Oqartussanut pigisassanngortinneqassaaq.

Imm. 2. Pigisat illersorniarlugit imminulluunniit illersorniarluni nannuttup tamanna ingerlaannaq Aalisarnermut Piniarnermullu Pisortaqaarfimmut nalunaarutigissavaa.

Kommunimi ileqqoreqqusat

§ 13. Kommunalbestyrelse kommunalbestyrelsilluunniit arlallit peqatigiillutik kommunip ileqqoreqqusaatigut nalunaarummi §§ 6-7 aamma §§ 9-10-mi aalajangersakkanit sakkortunerusunik aalajangersaasinnaapput kiisalu kommunip iluani sumiiffinni aalajangersimasuni piniarnerup qanoq ingerlanneqarnissaanut najoqqutassiorsinnaallutik. Kommunit ileqqoreqqusaat Aalisarnermut Piniarnermullu Naalakkersuisumit atuutilersinneqartassapput.

Nalunaaqutsiineq annissinerlu

§ 14. Nannunik nikkinnaveersitsineq nalunaaqutsiinerlu aatsaat pisinnaapput Aalisarnermut Piniarnermullu Naalakkersuisup akuersissuteqarneratigut.

Imm. 2. Nannut, nanuaqqat ilanngullugit, Naalakkersuisut akuersissuteqarsimatinnagit uumasuutigeqquneqanngillat.

Imm. 3. Nanuaqqat Kalaallit Nunaanniit anniseqqusaanngillat. Nannut inersimasut Kalaallit Nunaanniit anniseqqusaanngillat Naalakkersuisut akuersissuteqarsimatinnagit.

Imm. 4. Nannup sungaata puua taassumaluunniit ilaa nunanut allanut anniseqqusaanngilaq.

Immikkut akuersissuteqarneq piniarnermullu piumasaqaatit sukumiinerusut

§ 15. Aalisarnermut Piniarnermullu Naalakkersuisoq ilisimatusarnermut imaluunniit Kalaallit Nunaata piniagassatigut pisuussutaasa nalunaarsorneqarnerannut atatillugu nalunaarummi malittarisassat atortinneqannginnissaannik immikkut akuersissuteqarsinnaavoq.

§ 16. Aalisarnermut Piniarnermullu Naalakkersuisoq nannunniarsinnaanermut atatillugu piumasaqaatinik aalajangersaasinnaavoq, tassunga ilanngullugu ilisimatuussutsikkut misissuinernut atugassanik nannup ilaanik tunniussisarnissamut.

Pineqaatissiissutit

§ 17. § 2, § 3, imm. 4, § 5, §§ 8-10, § 11. imm. 1, § 12 aamma § 14-imi aalajangersakkat unioqqutinneqarnerat akiliisinneqarnermik pineqaatissiissutaasinnaavoq.

Imm. 2. Arsaarinnittarneq eqqarsaatigalugu tamanna pillugu Pinerluttulerinermik inatsimmi malittarisassat atuupput.

Imm. 3. Nannut taakkuluunniit ilaasa arsaarinnissutigineqartut qanoq atorneqarnissaat Aalisarnermut Piniarnermullu Naalakkersuisumit aalajangiivigineqartassaaq.

Imm. 4. Nalunaarut naapertorlugu kommunip ileqqoreqqusaliaanik unioqqutitsineq akilii-sitsissutaasinnaavoq pisamillu arsaarinnissutaasinnaalluni.

Atortuulersitsinermut ikaarsaariarnermilu aalajangersakkat

§ 18. Nalunaarut ulloq 15. oktober 2005 atuutilerpoq. Peqatigitillugu Kalaallit Nunaanni nannunniarneq pillugu nalunaarut nr. 20, 11. maj 1994-imeersoq atuukkunnaarsinneqarpoq.

Imm. 2. Piffissami nalunaarutip atuutilerfianiit ukiup pisassiiviup siulliup ulloq 1. januar 2006 aallartinnissaanut inuit atuuttumik inuussutissarsiutigalugu piniarsinnaanermut allagartallit § 5-imi aalajangersagaq apeqqutaatinnagu nannunniarsinnaatitaapput.

Namminersornerullutik Oqartussat, ulloq 22. september 2005

Hans Enoksen

/

Amalie Jessen

Ilanngussaq (pdf-format)

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut